

PEMBERITAHUAN PERTANYAAN BAGI JAWAPAN LISAN
MESYUARAT KEDUA, PENGGAL KETIGA,
PARLIMEN KETIGA BELAS,
MAJLIS MESYUARAT DEWAN RAKYAT

PERTANYAAN : LISAN

DARIPADA : DATUK MADIUS TANGAU [TUARAN]

TARIKH JAWAPAN : 10 JUN 2015 (RABU)
DI DEWAN RAKYAT

SOALAN :

Datuk Madius Tangau minta **MENTERI TENAGA, TEKNOLOGI HIJAU DAN AIR** menyatakan langkah-langkah yang diambil untuk memastikan bekalan elektrik sentiasa ada dan tidak selalu terganggu sehingga menjasakan pembangunan sektor ekonomi di Sabah.

JAWAPAN

Tuan Yang Dipertua,

Untuk Makluman Ahli Yang Berhormat,

1. Perancangan pembekalan elektrik di negeri Sabah merupakan suatu komitmen Kerajaan yang menyeluruh dan berterusan untuk mempertingkatkan tahap bekalan elektrik yang lebih berkualiti dan berdaya harap. Dalam hal ini, Indeks *System Average Interruption Duration Index* (SAIDI), dengan izin, bagi negeri Sabah telah menunjukkan pengurangan yang amat ketara dalam tempoh 5 tahun kebelakangan ini susulan usaha-usaha giat yang telah diambil oleh Sabah Electricity Sdn. Bhd. (SESB) dengan peruntukan yang disalurkan oleh Kerajaan Persekutuan. Secara statistik, pencapaian SAIDI bagi tahun 2009 sebanyak **2,867** minit/pelanggan/tahun telah dapat dikurangkan kepada **777.26** minit/pelanggan/tahun atau pengurangan sebanyak **72.9%** pada tahun 2014.

2. Prestasi sistem penjanaan yang kurang memuaskan semasa beban puncak telah diatasi dengan peningkatan kadar *reserve margin* pada masa ini dengan pengoperasian Stesen Jana Kuasa Kimanis Power (285MW), SPR Energy (100MW) dan Cash Horse (biomas - 10MW) pada tahun 2014. Selain itu, projek-projek penjanaan baru di

kawasan Pantai Timur Sabah termasuk Stesen jana Kuasa Kitar Padu 300MW di POIC Sandakan, dan pembinaan Stesen Hidroelektrik Upper Padas akan dilaksanakan. Kerajaan juga akan membangunkan sumber-sumber Tenaga Boleh Baharu di Sabah yang meliputi pembangunan loji biomass dan biogas, minihidro, geoterma dan solar dengan pelaksanaan skim *Feed-In-Tariff* (FiT) mulai tahun 2014.

3. Di samping itu, Kerajaan juga telah meluluskan peruntukan sebanyak RM2.295 bilion bagi melaksanakan pelbagai projek pembekalan elektrik di seluruh negeri Sabah dalam tempoh 5 tahun (2015 – 2020) akan datang. Kerajaan juga telah menubuhkan Pasukan Projek Khas Bekalan Elektrik Sabah di bawah Kementerian, atau dikenali sebagai SAPADU iaitu singkatan kepada *Sabah Special Projects Delivery Unit*, yang akan melaksana dan mengawalselia projek-projek pembekalan elektrik yang akan dilaksanakan.

4. Oleh itu, suka saya nyatakan di sini bahawa, dengan terlaksananya projek-projek pembekalan elektrik di Sabah ini, saya optimis bahawa bekalan elektrik di Sabah akan mencapai tahap yang lebih baik dan berdaya harap, dan seterusnya dapat menyokong pembangunan sektor-sektor ekonomi di seluruh negeri Sabah.
